



**Siunnersuut uunga: ILO-mi isumaqatigiissutinik Namminersorlutik Oqartussat akuersissuteqarnissaat pillugit Inatsisartut aalajangiussinissaannut siunnersuut; nr. 98 (kattuffiliorsinnaanermut pisinnaatitaaneq aamma ataatsimoorussamik isumaqatiginninniarsinnaatitaaneq pillugit), nr. 100 (assigiimmik akissarsiaqarneq pillugu), nr. 111 (atorfinitisitaaneq suliffeqartitsinerlu pillugit), nr. 138 (suliffeqarsinnaanermut ukiukinnerpaaffissaq pillugu) aamma nr. 182 (meeqqanik sulisitsisarnerit ajornerpaat pillugit)**

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

### **Siullermeerneqarnera**

ILO-mi isumaqatigiissutit tallimat Namminersorlutik Oqartussanit akuerineqartussanngorlugit Naalakkersuisut sinnerlugit Inuussutissarsiornermut, Suliffeqarnermut, Niuernermut Nunallu Allanut Naalakkersuisup saqqummiussai Partii Naleqqamiit naatsumik taparserlugit imatut oqaaseqarfigissavagut:

Siunnersuutip qulequtaani suut Nunarsuatsinni sulisartoqarnermi kattuffissuup pinerai ersarissumik takuneqarsinnaareermata taaqqinngikkaluarlugit, sulisartoqarnermi atugassarititaasut illersorneqarnissaat ukunani siunnersuutini pineqarpoq, taamaattumik tupigineqartariaqanngilaq siunnersuummut tapersersuigaanni.

Sulisartoqarnermut oqaluuserisaqarnerput iluatsillugu aamma sulisartut pisinnaatitaaffiannut tunngalluinnartuummat. Qanittukkut facebookimi oqallittartut ilaata misissuisimalluni imatut allagaqarpoq:

*” Kalaallit Nunaanni 2013-mi sulisartut inuit katillugit 25.461-mapput.*

*Kalaaleq agguaaqatigiissillugu akissarsiaa qammammut 22.779 DKK. Kalaallit sulisartut 2013-mi 21.807-put.*

*Qallunaat agguaaqatigiissillugu akissarsiaat qaammammut 43.865 DKK. Qallunaat tikisitat 2013-mi 3.241-put.*

*Nunami allamiut (qallunaat ilanngullugit) 2013-mi sulisartut 3.654-put. Qallunaat 3.654 ukiumoortumik agguaaqatigiissillugit akissarsiaat 515.168 ukiumoortumik akissarsiaanut atorneqartarput 1.882.425.792 DKK*

*Kalaallit 21.807 ukiumoortumik agguaaqatigiissillugit akissarfiaat 273.348*

*Kisitsisit naatsorsueqqissaartarfimmiit nassaakka nutaat!”*

Taamaassimassappat equnganerujussuaq suli atuuttoq ersarivippoq aammalu piffissanngorsimassalluni massakkut aaqqiivigissallugu. Naalakkersuisut tamanna eqqumaariffigaat, aamma eqqortuuppat iliuuseqarfiginiarpaat?

Soorlu aamma sulisartut pisinnaatitaaffiannut naapertuutissasoq ukiorpassuarni nunatsinni atugaanikoq sulilu tusarsaasuarluni, tassalu tunisassiorfinningaaniit angerlartiinnarneqartarnek, inuit pisinnaatitaaffianut naapertuutinngilluinnartoq, imminut tatiginissamut mangiartuisoq sakkortoq, inuullu naleqassusianut nungullarsaat, tamakku nunatsinni sulisartukkormiut atugarisaat, pisinnaatitaaffiit aqqani Naalakkersuisut tigussaasumik qanoq iliuuseqarfiginiarpaat?

Ullumi nunarsuarmi sulisartut ulluata aqagunnerani nunatsinni sulisartut iluatsillugu pilluaqqoriissuagut.

Qujanaq.